

Menyetla e se Nang Meeli



SABATHA THAPAMA

Bakeng sa Boithuto ba Beke Ena Bala:

1 Bakor. 12:12, Matt. 3:16–18, 1 Bakor. 12:7, 1 Bakor. 1:4–9, Matt. 25:14–30.

Teman'a Khopolo:

“Tsohle tseo li sebetsoa ke oona Moea oo o le mong feela, o ntse o abela e mong le e mong kamoo o ratang kateng” (1 Bakorinthe 12:11).

Molimo o re biletsa ho mo pakela (Liketso 1:8, Esa. 43:10). Ho paka ha se neo e khethehileng ea moea e fuoeng ba fokolang feela ba khethetsoeng eona. Ho paka ke pitso ea leholimo ea Mokreste e mong le e mong. Bibeले e sebelisa mantsoe a fapaneng ho hlalosa pitso ea rona kapele ho Molimo. Re lokela ho ba “leseli la lefatše,” “manqosa a Kreste,” “marena le baprista” (Matt. 5:14, 2 Bakor. 5:20, 1 Pet. 2:9). Oona Molimo ona o re biletsang ho paka le bosebeletsi o re fa matla a ho etsa mosebetsi oo. O fana ka lineo tsa moea ho molumeli ka mong. Molimo ha o bitse ba nang le makhabane a lokelang. O fana ka makhabane ho bao a ba bitsiseng. Joalo feela ka ha a fana ka pholoho ntle ho tefo ho bohle ba lumelang, o ba nea le lineo feela joalo.

Ha re inehela ho Molimo re nehelana ka maphelo a rona mosebetsing oa Hae, bokhoni ba rona ba ho sebetsa ha bo na pheletso. “Ha ho na moeli oa molemo oa ea behellang botho ba hae kathoko, e be o etsetsa tšebetso ea Moea o Halalelang sebaka pelong ea hae, e be o phela bophelo bo inehetseng ho Molimo ka botlalo.”—Ellen G. White, *The Ministry of Healing*, p. 159. Thutong ea beke ena, re tla ithuta ka bokhoni ba rona ba ho sebeletsa bo se nang moeli ka neo ea Moea o Halalelang.

**Ihute thuto ea beke ena ho lokisetsa Sabatha sa la 8 Phato.*

Lineo tse Fapaneng: Hammoho Tšebetsong

A na u kile oa nahana kamoo barutuoa ba neng ba fapane kateng e mong ho e mong? Moo ba tsoang teng, libopeho tsa bona, limelo tsa bona, le lineo li ne li fapane haholo. Empa sena se ne se sa sebetse khahlanong le kereke. E ne e le matla a eona. Mattheu, moleketho, o ne a le hlokolosi, a nepa, e le nepipi. Ka ho fapana, Petrose, o na phakisa a bua, a le sehlahlo hape a le lehala, feela o ne a boetsa a e-na le makhabane a boetapele. Johanne o n'a le pelo nolo feela a ipuela, hape. Andrease e ne e le motho oa batho, a hlokolosi haholo ka se mo potileng, a bile a le hlokolosi ho ba bang. Thomase o n'a na le tšekamelo ea ho botsisisa ka tlhaho. E mong le e mong oa barutuoa bana, leha ba ne ba na le libopeho le lineo tse fapaneng, Molimo o ile a ba sebelisa ka matla ho ba lipaki tsa Hae

Bala 1 Bakorinthe 12:12, 13, 18–22. Re fumana eng litemaneng tsee ka bohloki ba batho ba lineo tse fapaneng kahare ho 'mele oa Kreste, e leng kereke?

Molimo o khahlisoa ke ho nka batho ba tsoang libakeng tse fapaneng ba nang le talenta le litsebo tse fapaneng e be o ba nea lineo bakeng sa tšebetso. 'Mele oa Kreste ha se sehlopha sa batho ba tšoanang ka libopeho. Ha se mokhatlo oa lehae o nang le litho tse tsoang libakeng tse tšoanang ba buang ka ho tšoana. Ke sehlopha sa batho se fapaneng, ba lineo li fapaneng, ba kopanngoang ke lerato la bona ho Kreste le Lengolo, bao hape ba itelletseng ho arolelana lerato le 'nete ea Hae le lefatše (Baroma 12:4, 1 Bakor. 12:12). Lintho tsa 'mele oa Kreste li na le lineo tse fapaneng, e mong le e mong o bohlokoa hore 'mele oa Kreste o sebetse hantle. Joalo feela ka ha mahlo, litsebe, le nko li etsa mesebetsi e fapaneng empa kaofela li hlokeha 'meleng, le lineo kaofela lia hlokeha (1 Bakor. 12:21, 22).

Haeba o lemoha 'mele oa motho, le litho tse nyenyane ka ho fetisisa li na le mosebetsi oa bohlokoa. Lemoha lintši tsa hau. Hoja re ne re se na ntho e fokolang joalo ka lintši? Lerole le ne le tlo fifatsa pono ea rona, 'me ne re ka qetella re tsoile kotsi e ke keng ea lokiseha. Setho sa kereke se bonahalang se se bohlokoa ho feta tsohle, ke setho sa bohlokoa sa 'mele oa Kreste 'me se na le lineo tsa Moea o Halalelang. Ha re tella Molimo lineo tsena ka botlalo, motho ka mong ho rona a ka etsa phetoho ea bosafeleng.

Ho sa natse hore na u na le litalenta ha kae, ke lintho li fe tseo u sa ipabolang ho tsona empa ba bang kahare ho kereke ba ipabola ka tsona? See se lokela ho u boloka u le temeng ea hau joang?

Molimo: Mofani oa Mpho Tsohle tse Molemo

Ho latela 1 Bakorinthe 12:11, 18; Baefese 4:7, 8; le Jakobo 1:17, Molimo ke Eena mofani oa limpho tsohle tse molemo, ‘me “neo e ‘ngoe le e ‘ngoe e phethehileng” e tsoa ho Eena. Kahona, matsoala a rona a ka khutsa hore o tla re nea lineo tsa Moea o Halalelang tse loketseng libopheo tsa rona, ‘me o tla sebelisa litsebo tsa rona ho ntšetsa mosebetsi oa Hae pele le ho tlotlisa lebitso la Hae.

Bala Mareka 13:34 le 1 Bakorinthe 12:11. Molimo o nea bo mang lineo tsa moea?

Bibele e hlakile, Molimo o na le thomo e ikhethileng bakeng sa rona ka bo mong, oa ho arolela ba bang evangeli. Setšoantšong sa Jesu sa mong’a ntlo ea nkang leeto a siea bahlanka ba hae le ntlo ea hae a ba laela ho e hlokomela, mong’a ntlo o fa mohlanka e mong le e mong mosebetsi oo e leng oa hae (Mareka 13:34). Motho ka mong o na le mosebetsi, ‘me Molimo o fana ka lineo tsa moea ho bohle ho phethahatsa mosebetsi o halalelang kapa bosebeletsi boo ba bo bilelitsoeng. Ha re nehelana ka maphelo a rona ho Krete, ‘me re fetoha litho tsa ‘mele oa Hae, kereke, ka kolobetso, Moea o Halalelang o fana ka lineo hore re tle re tsebe ho sebeletsa ‘mele le ho pakela lefatše. Ka 1903, Ellen G. White o ile a ngolla monna e mong lengolo a mo khothaletsa ho sebelisa lineo tseo Molimo a mo fileng tsona bakeng sa mosebetsi oa Hae. “Kaofela re litho tsa lelapa la Molimo, haholo kapa hanyane re tšepetsoe litalenta tse tsoang ho Molimo, tseo re jarang boikarabello ba tšebeliso ea tsona. E ka ba talenta ea rona e kholo kapa e nyane, re lokela ho e sebelisa mosebetsing oa Molimo, ‘me re lokela le ho ananela tokelo ea e mong le e mong ea ho sebelisa neo eo a e neiloeng. “Le ka mohla re se keke ra nyenyefatsa leha ekaba moruo o kang o monyenyanane oa ‘mele, kelello le moea.”—Lengolo la 260, *Tšitoe* 2, 1903.

Bala Liketso 10:36–38, Mattheu 3:16–18, le Liketso 2:38–42. Litemana tsee li re ruta eng ka tšepiso ea Moea o Halalelang kolobetsong?

Joalo ka ha Jesu a ile a tlotsoa ka Moea o Halalelang ha a ne a kolobetsoa e le ho mo lokisetsa le ho mo matlafaletsa bosebeletsi ba Hae lefatšeng, e mong le e mong oa rona o tšepisitsoe Moea o Halalelang ha a kolobetsoa. Molimo o lakatsa hore re be le tiisetso e molemo ea hore o phethahalitse Lentsoe la Hae ‘me o re neile lineo tsa moea bakeng sa ho hlohonolofatsa kereke le lefatše.

Sepheo sa Lineo tsa Moea

Bala 1 Bakorinthe 12:7 le Baefese 4:11–16. Hobaneng ha Molimo o fana ka lineo tsa moea molumeli ka mong? Merero ea lineo tseo ke e fe?

Lineo tsa moea li phetha merero e mengata. Molimo o li fana ho otlala le ho matlafatsa kereke ea Hae hore e tsebe ho phetha bosebeletsi. Li retetsoe ho aha kereke e nang le bonngoe e ikemiselitseng ho phetha thomo ea Hae lefatšeng. Lingoli tsa Bibe le re fa mehlala ea lineo tsa moea tseo Molimo a li fang kereke ea Hae, joalo ka tšebeliso, ho etsa lithuso, ho phatlalatsa, ho ruta, ho khothatsa, le ho fana. E boetse e bua ka lineo tsa ho amohela baeti, mohau, ho thusa, ho elisa lifahleho, ho bua ka tse seng kae. Ho fumana lenane le felletseng, bala Baroma 12 le 1 Bakorinthe 12. Mohlomong o ipotsa lipotso ka phapano mahareng a lineo tsa moea le litalenta tsa tlhaho. Lineo tsa moea ke makhabane a fanoang ke Moea o Halalelang ho molumeli ka mong ho ba fa matla a ho etsa bosebeletsi ba bona bo ikhethang kahare ho kereke le lefatšeng. Li ka 'na tsa kenyelletsa litalenta tsa tlhaho tse halalelitsoeng ke Moea o Halalelang 'me li sebelisoa tšebelisoeng ea Krete.

“lineo tse khethehileng tsa moea ha se tsona feela litalenta tseo ho buuoang ka tsona setšoantšong. Ho kenyellelitse le lineo le limpho tsohle, e le tsa tsoalo kapa tse iphumanetsoeng, tsa tlhaho kapa tsa moea. Tsohle li loketse ho sebelisetsoa tšebeliso ea Krete. Ha re ba barutuo ba Hae, re inehela ho Eena ka sohle seo re leng sona le seo re nang le sona. O busetsa ho rona lineo tsena li hloekisitsoe li bile li ntlafalitsoe, molemong oa ho sebelisetsoa tlotliso ea lebitso la Hae ka ho hlohonolofatsa batho ba habo rona.” —Ellen G. White, *Christ's Object Lessons*, leq. 328. Hape, Molimo o thehile lineo tse khethehileng joalo ka neo ea boporofeta le mesebetsi e khethehileng ka kerekeng, ho kenyelletsa balisa le baholo, bao e leng baruti kahare ho 'mele oa Krete ho otlala le ho matlafatsa setho ka seng bakeng sa bosebeletsi (sheba Baef. 4:11, 12). Ke mesebetsi oa boetapele bohle ba kereke ho thusa setho ka seng ho fumana lineo tsa sona tsa moea le ho li thusa ho sebelisa lineo tsena ho aha 'mele oa Krete.

Ke litalenta li fe tsa tlhaho tseo u nang le tsona tseo, leha li thusa hape li le molemo boemong ba lefatše, li ka boelang tsa ba molemo le kerekeng?

Ho Fumana Lineo tsa Hau

Bapisa 1 Bakorinthe 1:4–9 le 2 Bakorinthe 1:20–22. Litemana tsee li re bolella eng ka litšepiso tsa Molimo haholo-holo lineo tsa moea pele ho ho tla ha bobeli ha Kreste?

Molimo o tšepisitse hore kereke ea Hae e tla bontšahatsa lineo tsa Moea kaofela pejana feela ho ho khutla ha Morena oa rona. Litšepiso tsa Hae li tiile. O re neile bopaki ba Moea o Halalelang lipelong tsa rona ho re tataisa ka bo mong ba rona ho ea kutloisisong ea lineo tseo a re neileng tsona. Ke Molimo o fanang ka lineo tsena ka Moea o Halalelang o re senolelang tsona.

Bala Luka 11:13, Jakobo 1:5, le Mattheu 7:7. Haeba re na le takatso ea ho fumana lineo tsena tseo Molimo o re neileng tsona, o re memela ho etsa joang?

Re amohela lineo tsa Moea ha re inehela ho Molimo ‘me re mo kopa hore a re senolele lineo tseo a re fileng tsona. Ha lipelo tsa rona li tlhotliloe boikakaso ‘me sa mantlha ho rona e le ho sebeletsa Jesu, Moea oa Hae o tla re ama ka linero tseo a nang le tsona bakeng sa rona. “E bile feela kamor’a hore barutuoa inehela ka botlalo ka thapelo le tumelo hore a sebetse moo ba ileng ba amohela tšollelo ea Moea. Ke moo ka tsela e khethhileng melemo ea leholimo e ileng ea tšepeloa balateli ba Kreste. . . . lineo tsena e se ntse e le tsa rona ho Kreste, empa hore re li amohela ho itšetlehile kamohelong ea rona ea Moea oa Molimo.” — Ellen G. White, *Christ’s Object Lessons*, leq. 327. Lineo tsa moea (sheba 1 Bakor. 12:4–6) ke makhabane ao Molimo o fanang ka oona hore re tle re tsebe ho mo sebeletsa ka katleho. Litšebeletso ke libaka tse ngata tseo ho tsona re hlhisang lineo tsa rona, ‘me liketso ke liketsahalo tse khethollohileng tse re lumellang ho sebelisa lineo tsa rona. Lineo tsa moea ha li tle se ntse li ntlafetse ka botlalo. Ha Moea o Halalelang o ntse o u ama ka sebaka se itseng sa tšebetso, rapella hore a tle a u tataisetse bosebeletsing bo khethollohileng hore u tle u sebelise neo ea hau ka ketso ea ho fihlela ba bang.

Lineo tsa hau tse ikhethang ke li fe, ‘me hoa bohlokoa ka ho fetisa, u ka ntlafatsa lineo tseo joang bakeng sa bosebeletsi ba Morena?

Ho Holisa Lineo tsa Rona

Bala setšoantšo sa litalenta ho Mattheu 25:14–30. Ke mohopolo o feng oa bohlokoahali o hlahllelang ka mahetla ho uena paleng ee? Hobaneng ha bahlanka ba babeli ba thoholetsoa ke Molimo ‘me oa ho qetela a tsuo? Setšoantšo see se re bolella eng ka tšebeliso ea litalenta tsa rona? Talima ka kotloloho Mattheu 25:29.

Morena o ile a nea mohlanka e mong le e mong ho ea ka “matla a bona” (Matt. 25:15). Motho ka mong o fumane talenta tse sa lekaneng ka palo. E mong a fuoa talenta tse hlano, e mong tse peli, ‘me e mong e le ‘ngoe. Mohlanka ka mong o ne a na le ketho ea hore na o hoeba kapa ho sebelisa talenta tseo a li fuoeng joang. Taba ea bohlokoa mona ke hore seo ba neng ba se fuoe e ne e se sa bona. E ne e le tsa e mong osele ea neng a ba beile balebeli ba tsona.

Khathatseho ea morena oa bona e ne e se hore na ke mang ea fetisang kapa ea fokolang ho feta ba bang ka litalenta. E ne e se hore na mohlanka ka mong o fuoe talenta tse kae. Khathatseho e ne e le hore na mohlanka ka mong o entse eng ka seo a se fuoeng. Pauluse o e beha tjena ho 2 Bakorinthe 8:12, “Hobane haeba pele ho le teng kelello e ikemiselitseng, e amoheloa ho latela seo motho a nang le sona” ho Molimo, hoa bohlokoa ha se hore na u na le eng, empa, hore na u etsa eng ka seo u nang le sona.

Molimo o ile a thoholetsa bahlanka ba babeli ba pele hobane ba ile ba sebelisa litalenta tsa bona. Litalenta tsa bona li ile tsa eketseha ka lebaka la ho sebelisoa. Mohlanka ea “khopo” ha a ka a sebelisa talenta eo a e fuoeng, ‘me ha ea ka ea eketseha. Ke ‘nete ea bosafeleng hore “Molao oa bosebeletsi o fetoha khokahano e re hokahanyang le Molimo le batho ba habo rona.”—Ellen G. White, *Christ’s Object Lessons*, leq. 326. Mohlanka ea soto o ne a bapetse ka monyetla oa ho sebeletsa ‘me a qetella a lahlehetsoe ke bokhoni ba ho sebeletsa. Ha re sebelisa lineo tseo Molimo o fe fileng tsona bakeng sa tlitliso ea ea lebitso la Hae, li tla eketseha, li sarolohe, ‘me li hole. U ka sibolla joang litalenta tseo Molimo o u fileng tsona? Kopa ka boikokobetso hore Molimo o u sibolle libaka tseo a lakatsang hore u sebetse ho tsona boromuoenng. Haa u ama, ikamahanye. Lineo tsa hau li tla hola ha u li sebelisa, ‘me u tla fumana khotsofalo bosebeletsing ba Hae.

Nahana ka setšoantšo sena ‘me u se amahanye le bophelo ba hau. Se reng ho uena, haeba ho na le letho, ka seo u ntseng u se etsa ka seo u se fuoeng ke Molimo? (Hopola hape, eng kapa eng eo u nang le eona ke mpho e tsoang ho Molimo.)

Ho Ithuta Haholoanyane:

Bala Ellen G. White, “Litalenta,” maq. 325–365, ho *Christ’s Object Lessons*. Kutloisiso e nepahetseng ea thuto ea Bibe le ka lineo e tlisa bonngoe kerekeng. Kelohlolo ea hore e mong le e mong oa rona o bohlokoa ‘me ke setho se hlokehang sa ‘mele oa Krete ke mohopolo o kopanyang. Setho se seng le se seng sa kereke sea hlokeha bakeng sa ho phetha thomo ea Krete. Setho se seng le se seng se filoe bakeng sa bosebeletsi. “E mong le e mong o fuoe mosebetsi oo a lokelang ho u etsesa Morena. O tšepetse mohlanka e mong le e mong oa Hae lineo kapa litalenta tse khethehileng. ‘A nea e mong litalenta tse hlano, e mong a mo nea li le peli, e mong a neoa e le ‘ngoe; e mong le e mong a neoa ka matla a hae.’ Mohlanka e mong le e mong ho na le seo a se tšepetsoeng seo a jarang boikarabello ba sona; ‘me tseo re li tšepetsoeng li fapana ho ea ka matla a rona. Ha a fana ka lineo tsa Hae, Molimo ha a ea ka leeme. O fane ka litalenta ho latela matla ao a a tsebang a bahlanka ba Hae, ‘me o lebelletse puseletso e tšoanelang.”—Ellen G. White, *Testimonies for the Church*, pok. 2, leq. 282.

Hape hopola hore lineo tsa Moea li fanoa bakeng sa tlotliso ea Molimo e seng ea rona. Molimo o li fane ho phahamisana lebitso la Hae le ho ntšetsapele mosebetsi oa Hae.

Lipotso tsa Puisano:

1. Tsepama mohopolong oa hore e mong le e mong oa rona o amohetse mpho ho tsoa ho Molimo. Se se re’ng ho kereke ea hau ea lehae? Mohopolo oo o ka tlisa phapano e fe bakeng sa ho kenyelletsa setho ka seng bosebeletsing?
2. Arolelana le litho tsa Sabatha Sekolo hore na lineo tsa setho se seng li u hlohonolofalitse joang. Arolelana le sehlopha kamoo u sibollotseng lineo tsa hau tsa moea. U nahana lineo tsa hau ke li fe, ‘me u li sebelisa joang ho hlohonolofatsa ba bang?
3. Thuto ena e supile hore lineo tsa rona lia hola ha re li sebelisa. Hetla morao bophelong ba hau. U ka nahana ka lineo tseo Molimo a u fileng tsona tse sarolohileng ke hobane u li sebelisitse tlotlising ea lebitso la Hae? Ka nako e tšoanang, ipotse hape potso, e botsitsoeng qetellong ea thuto ea Labone, ea kamoo u tšepelang kateng ka seo Molimo o u fileng sona.